



PELAJAR baharu UPNM mengangkat sumpah dalam majlis MPJD di Kem Perdana Sungai Besi, baru-baru ini.

## UPNM terima 880 pelajar baharu

**S**ERAMAI 880 pelajar terpilih melanjutkan pengajian asasi dan diploma di Universiti Pertahanan Nasional Malaysia (UPNM).

Sehubungan itu kesemua mereka menghadiri Majlis Perasmian Minggu Perkasa Jati Diri (MPJD) Program Asasi Pertahanan dan Program Diploma Sesi Akademik 2018/2019 di universiti itu baru-baru ini.

Majlis yang turut disertakan dengan bacaan ikrar telah disempurnakan oleh Leftenan Jeneral Datuk Abdul Halim Jalal di universiti tersebut.

Semua pelajar tersebut akan mengikuti pengajian

asasi dan diploma masing-masing yang disediakan oleh UPNM antaranya Asasi Pengajian dan Pengurusan Pertahanan, Asasi Kejuruteraan, Diploma Pengurusan Logistik dan Diploma Ketangkasan Pertahanan.

Semua pelajar terbabit akan mengikuti pengajian selama kira-kira tiga tahun bergantung kepada bidang masing-masing.

Sejarah UPNM bermula dengan penubuhan Akademi Tentera Malaysia (ATMA) pada 1 Jun 1995 sebagai organisasi yang bertanggungjawab menjalankan program pengajian pada peringkat sarjana muda dan latihan ketenteraan kepada Pegawai Kadet Angkatan

Tentera Malaysia (ATM).

Peranan ATMA kemudian dipertingkatkan dan diperluas dengan penubuhan UPNM pada 10 November 2006.

UPNM mempunyai pengalaman selama 11 tahun mengendalikan program pengajian pada peringkat sarjana muda dari tahun 1995 hingga 2006 dengan program kerjasama antara Kementerian Pertahanan serta Universiti Teknologi Malaysia (UTM).

Kini UPNM semakin berkembang dengan kursus lain termasuk program diploma dan asasi bagi memenuhi keperluan yang diperlukan sama ada pada peringkat Angkatan Tentera Malaysia (ATM) atau awam.